



De Probatis|| Sanctorvm|| Historiis

Partim|| Ex Tomis Aloysii Lipoma-||ni, Doctissimi Episcopi, Partim Etiam||
Ex Egregiis Manuscriptis Codicibvs, Qvarvm permultæ antehàc nunquàm
in lucem prodière

Complectens Sanctos Mensivm || Ianvarii Et Febrvarii

Surius, Laurentius

Coloniae Agrippinae, 1576-

VD16 S 10258

Oratio item S. Cyrilli episcopi Hierosolymitani de occursu Domini nostri
Iesu Christi, & de Simeone qui Deum excepit.

[urn:nbn:de:hbz:466:1-77365](https://nbn-resolving.org/urn:nbn:de:hbz:466:1-77365)

gnum Paulum docentem; Despondi vos vni viro virginem castam exhibere Christo; & non violemus, quæ inita sunt cum eo, pacta conuenta, per consuetudinem cum eo, qui vitam nostram corrumpit ex eo, quod faciamus illius voluntatem; vel in hoc Prophetissæ imitantes pudicitiam; quæ fuit vnico contenta coniugio. Sed quod est in promptu, ab imitatione eius non discedatis, quicumque soluti estis à monogamia; & si fieri possit; ad secundas non veniatis nuptias. Sic enim vos beatos futuros esse affirmat Paulus. Offeramus nos quoquè in superno altari, veluti par turturum, animi & corporis puritatem; vel tanquàm duos pullos columbarum, prouidere bona, non solum coram Domino, sed etiam coram hominibus; vt cum nos quoquè omnia spiritaliter ex diuina lege fecerimus, in sapientia & gratia proficientes; & ad mensuram ætatis plenitudinis Christi peruenientes; & internum hominem perfectum habentes, & sancti spiritus effecti habitaculum; reuertamur ad veram nostram patriam, cælestem Hierusalem; In qua digni habeamur frui beata ac perpetua lætitia & regno, in Christo Domino nostro; cui gloria & potentia cum patre & sancto spiritu; nunc & semper & in secula seculorum, Amen.

SANCTI PATRIS NOSTRI AMPHILOCHII
EPISCOPI ICONII ORATIONEM DE OCCVRSV DOMINI nostri Iesu Christi, & de Dei parente & Simeone, quæ hoc loco in V. Tomo D. Aloysij sequebatur, idcirco non posuimus, quòd paulò supr à eam ex VII. Tomo eiusdem Aloysij, sed alio interprete, posuerimus.

SANCTI PATRIS NOSTRI CYRILLI ARCHIEPISCOPI
HIEROSOLYMITANI ORATIO DE OCCVRSV DOMINI nostri Iesu Christi, & de Simeone, qui Deum excepit.



DAETARE valde filia Sion; prædica lætitiã filia Hierusalem; duc choros popule ciuitatis Dei. Exultate portæ & muri Sion; & vniuersæ terræ clamate montes & colles; & valde exultate. Fluij plaudite; & rupes Sion comprehendite Dei aduentum; in eum intuentes. Concinant hodiè cælestia cum terrenis; & Hosanna dicant cum ea, quæ est infernè, Hierusalem, propter Christum; qui est in ipsa. Cælestium intelligentes virtutes, choros ducite. Qui estis in terris, cum angelis hymnos canite. Hodiè enim gloriosa dicta sunt de te, ciuitas Dei Hierusalem; ciuitas regis magni; aperiat portas ei, qui aperuit omnibus cælestes portas, & aperuit in cruce ostia sepulcrorum, & contriuit portas inferorum, quæ erant ab æterno; & admirabiliter clausit portas virginitatis. Hodiè, q̄ mirabiliter olim respõdit Mosi in monte Sina, diuinè implet legem; factus sub lege. Hodiè Deus à Themam; venit Sion. Hodiè cælestis sponsus cum thalamo Dei matris venit in templum. Filia Hierusalem, egredimini in occursum eius. Lampades alacriter accendamus vero lumini. Tunicas animarum paremus sponso Christo cum Sion. Gentium populi, lucem ferentes occurramus cum templo. In templo ad Deum Christum conueniamus. Cum Angelis hymnum canamus; Sanctus, Sanctus, Sanctus, Dominus Sabaoth; Plenum est cælum & terra gloria eius. Pleni sunt fines mundi bonitate eius. Plena est eius laude omnis humanitas. Eius indulgentia plena sunt cælestia, terrestria & inferna; plena misericordia; plena donis eius & beneficijs. Omnes ergò gētes plaudite manibus. Omnes gentes terra venite & videte opera Dei. Omnis spiritus laudet Dominum. Omnis terra adoret. Omnis lingua canat & psallat, & glorificet puerum Deum, qui est quadraginta dierum, & est ante secula; puerum paruum, & antiquum dierum; puerum laetentem, & seculorum effectorem.

Infantem adspicio; & Deum meum agnosco. Infantem qui lætet, & mundum nutrit. Infantem qui flet; & mundo largitur vitam & lætitiã. Infantem qui inuoluitur fascijs,

fascijs; & me liberat à fascijs peccati. Infantem in vlnis matris verè cum carne & sine defectu in terra; eundem verè in sinu patris, & sine defectu in cælis. Infantem video in Bethleem, Hierusalem ingredientem; & qui nequaquam separatur à superna Hierusalem. Infantem video, qui ex lege in templo offert sacrificium in terra; sed idem pia omnium sacrificia in cælis excipit. Ipsum in vlnis senis per dispensationem; eundem in maiestate diuina in thronis Cherubicis. Qui offertur & purificatur; sed idem omnia purificat & purgat. Ipse est ergò donum, ipse Pontifex; ipse ara; ipse propitiatorium. Ipse qui offert; ipse qui pro mundo offertur. Ipse ignis; ipse holocaustum. Ipse lignum vitæ & cognitionis. Ipse agnus, ipse gladius spiritus. Ipse pastor, ipse ouis. Ipse sacrificus, ipse qui sacrificatur. Ipse qui offertur; ipse lex; & ipse qui suscipit sacrificium.

Sedenim agè deceterò dicamus de die ex sacris Euangelijs. Ait enim de Christo Luc. 2. Lucas admirabilis; Quando impleti sunt dies purificationis eorum secundum legem Moïsis, duxerunt Iesum Hierusalem, vt sisterent eum Domino; quomodo scriptum est in lege Domini; Omne masculinum aperiens vuluam; sanctum Domino vocabitur. Nam Samuel quidem & Isaac, & simul etiam Iacob & Ioseph & alij multi, qui præter spem nati sunt ex sterilibus, & aperuerunt infertiles vuluas matrum, sancti Domino vocati sunt; Christus autem solus ex solo vnigenitus, cum virginales portas non aperuisset, non est sanctus Domino, sed sanctus sanctorum, & Dominus dominorum, & Deus deorum, & primogenitus primogenitorum; princepsque & rex regnantium & vocabitur & credetur; & nunc in templo à Simeone prædicabitur. Erat enim, inquit, homo in Hierusalem, cui nomen Simeon. Et ipse erat homo iustus; & spiritus sanctus erat cum eo; & fuerat ei datum responsum à spiritu sancto, non visurum eum mortem, priusquam videret Christum Domini. Et venit in templum in spiritu. Et cum introduxissent parentes puerum Iesum, vt ipsi facerent secundum morem legis de ipso, ipse Simeon accepit eum in vlnis suis; & benedixit Deum; & dixit; Nunc dimittis seruum tuum Domine secundum verbum tuum in pace. Quoniam viderunt oculi mei salutare tuum, quod parasti ante faciem omnium populorum. Lumen ad reuelationem gentium, & gloriam plebis tuæ Israël.

Quis loquetur potentias Domini; auditas faciet omnes laudes eius? Qui continet vniuersam terram pugillo, senis vlnis capitur; & portatur; qui fert omnia verbo virtutis suæ. Exultet Adam, per Simeonem Christo dicens; Nunc dimittis seruum tuum Domine secundum verbum tuum in pace. Nunc me soluis ab æternis vinculis. Nunc me soluis ab interitu. Nunc me soluis à morte. Nunc me soluis à mœrore. Meum Dominum & Deum Simeon in templo vlnis amplectens, altum œconomie mysterium significauit omnibus gentibus. Iudæis enim annuncians, exilit & exultat; & clara voce de eo aperte clamat, dicens; Hic est, qui est, & antè est, & semper adest, cum patre eiuſdem essentia, in eadem sede sedens, eiusdem gloria & potentie; par potentia, omnipotens, principio carens, increatus, inalterabilis; qui nec circūseribi, nec adspici, nec verbis explicari, nec comprehendere, nec contrahere, nec mente concipi, nec conijci potest. Hic est splendor paternæ gloriæ. Hic est character substantie omnium cõstitutionis. Hoc est lumen luminis, quod oritur ex sinu patris. Hic apud Deum, & ex Deo Deus cognoscitur. Hic est fons vitæ, ex fonte patris vita procedens. Hic est Dei fluuius, qui exit è diuina abyſso; sed ab ea non separatur. Hic est thesaurus bonitatis paternæ, & æternæ beatitudinis. Hæc est aqua vitæ, quæ vitam mundo largitur. Hic est radius increatus; qui ex sole patre luminum gignitur; sed non scinditur. Hic est Deus Verbum; quod ex ijs, quæ non sunt, ad hoc vt essent; solo verbo omnia constituit. Hic est Lucifer, qui ante Luciferum incorporeas adornauit virtutes, cœlestium exercituum & ordinum. Hic est, qui cœlum extendit solus; & super mare ambulat tanquam super cælum. Hic est, qui abyſsum caligine inuoluit tanquam fascijs; Hic est, qui terram firmavit super aquas; Hic est, qui mare sepsit arena, tanquam muro; Hic est, qui lucem diuisit à tenebris; Hic est, qui circularem astrorum ornatum composuit; Hic est, qui vniuersum tam qui cernitur, quam qui intelligentia apprehenditur, mundum constituit in sapientia; Hic est, qui non fictis manu manibus, ex luto hominem finxit, & formauit; Hic est, qui ad Dei imaginem nos fuit fabricatus; nunc ipse ad nostram imaginem homo factus. Quingentiam Deus, id quod mente percipitur, perfectus; ex perfecto patre habens essentiam. Qui cum esset in forma Dei Dominus, nunc meam suscepit formam seruilem; non diminuens dignitatem diuini.

Psal. 105.
Eſai. 40.
Hebr. 1.

Hebr. 1.

Iob 9.
Iob 38.
Psal. 135.

diuinitatis, sed sanctificans, vt sanctificaret massam meam naturam supra totus & infra totus. Qui idem cognoscitur, supernè genitus sine tempore, & infernè sine semine! supernè effector, infernè res creata. Audite omnes gentes; audi Israël. Dominus hic est, quem ego sacerdos tuus Simeon, gestans in vlnis, magna voce prædico; in templo populo testificans.

Quamobrem attendite popule mi sermonem meum; inclinate aures vestras ad verba oris mei. Hic est puer; de quo Esaias prius prædicauit, dicens; Puer natus est nobis, & filius datus est nobis; & vocatur nomen eius magni consilij Angelus, admirabilis consiliarius, Deus fortis, princeps pacis, pater futuri seculi. Sic est ergo hic puer Deus fortis; de eo significans Dauid quoque dixit; Videbitur Deus deorum in Sion. De hoc puero clamat etiam Hieremias; Deus in terra visus est; & cum hominibus conuersatus est. Hic est puer, qui olim mare perfremit Israël, & submersit Pharaonem, & legem dedit Israëlitis, & pluit manna, & in columna ignis deduxit genus Hebræorum; & petram rupit, & rubum flamma ignis, tanquam rore cinctum; conseruauit incombustum. Hic puer Mosem quadraginta annos fecit pastorem, & quadraginta annos constituit Duce[m] Israëlitis; & cum corroborauit, vt ieiunaret quadraginta dies. Sic ipse quoque puer baptizatus, ieiunauit quadraginta dies, & post quadraginta dies à mortuis regenerationis ascendit in supernam Hierusalem; & post quadraginta dies sui ortus ex virgine, nunc ingressus est in terrenam Hierusalem.

De hoc puero prius etiam prædicauit Propheta Habacuc, dicens; Deus à Themam veniet; hoc est, ab austro. Ab austro enim Hierusalem est Bethleem; A Bethleem autem nunc ingressus est Sion. Propter hunc puerum Moses nobis testificatus est, dicens; Prophetam vobis suscitabit Dominus Deus ex fratribus vestris; & omnis qui non audite eum, exterminabitur ex terra viuentium. De hoc puero Propheta Dauid vota fecit, dicens; Qui sedes super Cherubim, appare; excita potentiam tuam; & veni ad nos seruandos. Et alibi; Cito præoccupent nos miserationes tuæ Domine. Et rursus; Domine, inclina celos tuos, & descende. Et alibi; Tu Domine Deus virtutum, attende ad visitandas omnes gentes. Quamobrem cognoscite gentes, & vincimini. Videte Iudæi, & persuadeamini, quod hunc puerum laudant angeli; hunc adorant archangeli; hunc tremunt potestates, hunc glorificant virtutes; huic seruiunt Cherubim, hunc Deum prædicant Seraphim; huic sol seruit, huic ministrat luna; huic obediunt elementa; huic subijciuntur fontes. Hunc puerum cum vidissent, portæ inferorum sunt contra; portæ autem caelestes sunt aperta. Hic puer mortem aboleuit, diabolus pudore affecit; maledictum soluit, dolorem cessare fecit, serpentem contriuit; intermediam maceriam discidit, malum chirographum peccatorum perfremit; peccatum conculcauit, errorem aboleuit; surgere fecit creatam naturam. Hic puer Adam conseruauit, Euam refinxit; gentes vocauit; mundum illuminauit.

Quamobrem venite vos omnes Christi & Dei amantes, Domino læti & mundi occurramus, non legaliter, sed spiritaliter; non ventrem delicijs explentes, sed spiritu exultantes; non nos vino inebriantes, sed spiritu feruentes. Læti hodiè lampades ornemus. Tanquam filij lucis, ceras veræ luci Christo offeramus. Quoniam lumen ad reuelationem gentium mundo apparuit, idè lumina ex lumine supra niuem resplendeamus; supra lac dealbati, supra sapphirum illuminati, supra immaculatas columbas in caelos euolantes; ita in nubibus ad Dei occursum exeamus. Hodiè dilecti festi cursum perpetuo peragamus. Cum Angelis choros ducamus, cum pastoribus illuminemur, cum orthodoxis adoremus; cum Bethleem festum agamus, cum Sion occurramus, cum templo sanctificemur, cum virgine festum agamus, cum Simeone Christum vlnis amplectamur; vt simus intra æterna Christi bona, gratia & miserationibus & clementia Domini nostri Iesu Christi, cui gloria & potentia nunc & in secula seculorum, Amen.

Nota per
uctutum
Ecclesie
morem de
ceris hac
die in ma
nibus ge
standis.